

九

篇

集

九齋集詩目錄

卷之一

樂府

官妓好痛積金也

樓船壞惜棄物也

行路難

于闐吟傷棄捐也

懊恼曲慕熱心也

離別引傷懷人也

苻離集新黃河也

李南華女郎懊惱曲

共十二首

葛成謠

五首

五言古

送張比部奉使南還兼訊洪水部

七言古

燕中別焦三

丈夫行贈吳大

射鶴行贈吳一

卷之二

五言律

鳥啼

送叔父隱居震澤

索復

近况

寄遠

送焦三

題范大博野居

送何大入蜀

亡兒虎

自適居

古意

自笑

寄趙二

寄遠

金山

贈金山僧

賦得夢約水精環

賦得黃河如帶

懷錢大暨趙二

送友人

下第別友人

計二首

九日同友人登興德寺觀空臺有懷故園

寄友人

淮陰道中

廣陵早發

感時

月中宿邵伯

共三首

淮上

滁陽懷郭氏故封

關山謁武安王廟

秋日重經宿州時濉水爲黃河所遏瀰漫
無際四顧蕭然余嘗三渡苻離是役不
勝悽惋遂托四咏

桃山謁岳武穆祠

汶上

渡故宋漕河

計三首

河間

採蓮

長安邸中同洪令君守歲得年字

卷之三

七言律詩

時事四首

送大令

二首

真州送別

與錢一辨西湖西子暨誇杜蘭香太湖

四首

寄家二兄

與錢大作別先夜夢隔岸之詠醒而足之

因嘲其墨守西湖

秋日送高太史還朝

寄錢大

送陳工部奉使南還歸省

二首

送謝大行使河粵兩藩

送閩縣

除夜志感

歲暮即事四首

出都門

偶觸

計偕

豪門

自鄭州抵雄縣

止客遊江南

送黃比部

送徐比部并慰悼亡

送人

送鄭都官使雍州

宿負交謫復棄所居即事戲簡壁端

夏日夢至吳中桃花庵與見桃上人試畧

金閭春夜有懷故園

送王比部

客遊出門口號

送友人 使建業

贈許侍御

秋日遷居豐城里

送李比部奉使密雲便道南還

京中人日立春同洪令君之鷺峰寺禮旒

檀佛歸惱張比部邀酌不踐

二首

送吳大行

元日試筆同洪令君得思字

無題八首

代贈

壽客

共二首

送袁三從軍

計二首

代人寄遠

卷之四

五言絕句

張女郎孝思歌

共五首

朱孝廉允復旋被論落籍作九章廣之

七言絕句

戲兒

病中自譴

和藍進士箕仙邊庭四時歌

計五首

白氏第五女郎長齋十二絕句

雜興

計三十首

應袁大史燕中祠白太傅蘇學士有懷故

園四時歌

計四首

和錢大虎丘茉莉曲

計十首

娥眉

題金龍大王廟

徐州

寄錢郎

語然香人

燕中有懷群公十絕句

誚客

贈徐女郎

計四首

贈別

燕中元旦戲題神廟

口號

五言排律

早秋寄懷趙二

七言排律

送高太史奉使瀋瀋歸省

秋日過滕縣

調

長相思

計五首

曲

中呂鮑老兒

北九宮

堯民歌

十二月

目錄終

九齋集詩卷之一

華亭宋楙澄幼清甫著

樂府

友人俞安期美長甫校

官妓好痛積金也

我朝太祖神而武惟有官妓不廢古百官暇日
選勝時一曲黃金賤於土錢刀譬若地中泉當令
周旋如轉圜假如羈頓錢一貫天下遂少一貫錢
在官取錢在官費妓與官通民不痒苟其踈遠紅
粉樓自然可對朱衣吏一從廢置官妓來十人九
將刀布回吝心不折白門柳熱中輦向黃金臺吁

嗟禮去羊猶在處處青樓仍不改他鄉攫金遺子
孫蕩盡娼家心不悔乃知女妓真忠臣默移乾潛
轉坤別有閒人號吹客知音識曲聽其真一陰一
陽如魚水慣引繁華年少子滿口都傾如意珠千
金不惜鴛鴦被何時官妓列勾欄百官買笑更追
歡司馬君實復生日不在妓則在官

樓船壞惜棄物也

樓船壞半沉半浮不堪賣風衝浪打雨淋漓舊例
官船若公廨此船昔年下水時三牲賽神敦舵師
船頭翠荇浮萍實舷下蒼龍動水漪一船大小十

餘室中居貴人餘趨客貴人多是肉食人或奉

綸音或奉職爾時船頭蒙貴人暗通僮僕如交親
私帶硝黃與塩盜偷買人夫并折銀江河諸船納
款慣偏遇漕輸尤侮慢有時悞觸索賠償典男育
女不堪辨一家相對輕神仙饑餐酒肉醉來眠頻
催白下翻紗樣寄語揚州換翠鈿耳中日日盈絲
竹竈下年年祈萬福一朝發漏不堪行換却新船
笑相逐樓船爾費 朝廷金如何但快船頭心國
家官馬責民養馬死還責民家任爾壞何不責令
船頭換却令別給新船爾自爛古人竹頭木屑皆

收藏曷不取船代薪炭

行路難

金鈺鈺鼓闐闐務牲血然紙錢在家依父母出外
仗神天所嗟神天仗之良難嗟我生靈寄於帆轅
悲我干將不離枕前山河帶礪可以言旋

于闐吟傷棄捐也

大風有隧雉離于闐
有人在下一我欲輔之

上客當酒莫作喧小人有夢陳之言三花樹前金
骨仙贈我盈袖塗血錢其一騰空化爲月璧海銀
臺綺雲結岸斷珠迷魚服龍霧深花傳鮫人血五
色鸚鵡璠與籠頻憎採花生不工芙蓉戲躍兩角

鯉錦駝散翼波寫紅晚霞分奠井鬼柳雲旗降靈
時在西南箕絳燭燃綺堂西岳蓮花盈素手相將
玉腕露珠簾滿贈星辰侶日南健兒簫管明明月
少女笙歌昔昔盭沃焦沃海海水熱鼇足支山山
柱折日月高高照雪山皎皎精誠不可滅不可滅
余心寒浩浩河流何時可還龍門闔宮金翅搏雷
鼓砰訇啄鍵關炤眼火燦玉花帽鋸牙金爍獸面
鑲我欲訴之上帝前白榆歷歷難與言山川攸遠
路漫漫我所思兮良可嘆行路難上畱田

懊惱曲慕熱心也

交多中絕
托言慕之

燈影星光踈曉月青漢銀河半明滅一夜夢中復
夢中孤魂離別復離別庭前開盡合歡花手中解
却同心結擬輸東海沃焦山將來逼却郎心熱

離別引傷懷人也

物猶如此人何以堪
續處改火期可已矣

馬蹄印荒堤明月印馬蹄明月却迷飛絮色馬蹄
踏遍落花泥君泪流妾枕妾泪流君衣角枕龍鬚
同未得羅衣馬首空相憶羿后空栽連理枝天孫
不織雙飛翼楊柳垂垂金鏡春梨花脉脉綺雲新
不愁驄馬歸無日多恐紅顏更有人明眸射月愁
無寐角枕羅衣耿相對他年銷鑠化爲塵賤妾與

君空有泪

符離集新黃河也

黃河不走古徐州向南直奪濉水流呂梁山口泥
沙塞符離橋畔神鬼愁去年水發睢陽北白骨纍
纍山頂頭白骨纍纍亦細事舊河深淺關天子
節度龐眉爲督糧尚書白首因都水吾聞黃河之
水天上來茫茫禹跡非人開萬一不從故道走運
河枉種青青柳昨開新河十萬人遺老傷心半似
真鯉魚寂寞桃花水銅虎交馳柳葉文只今依舊
還如帶百萬錢刀竟何在近來新鑿小黃河濶處

不能五丈多三十二壩河如束舊河不能遮馬腹
可憐淮泗尚滔滔龍沙水穴鷗鷺巢德州城下人
競涉往來只仗人夫拽開田觸諱海運迂好事往
往徒上書憶昔漢都函谷裏漕輓如雲復如雨夜
夢河伯爲我言 天子精誠可格天漢武負薪瓠
子塞願我 陛下思無斃千秋萬歲樂無極

李南華女郎懊惱曲

有序

余讀梅君季豹解嘲詩序太張楚而悲吳然蘭
香人天含啼震澤麻姑桑海作客胥門玉悅動
君王之悲真娘塋烈士之側仙骨雄心他方莫

躋豈若鄭袖妬而美人剗神女見而襄王夢哉
且三戰及郢畢處王宮二年報越遂興娃館楚
越之妖冶直吳之枕簟也南華女郎雖身客清
溪而心留吳會景升季豹狎而嘲之豈七尺委
卿之意乎何無香火情也爲作懊惱曲

可憐金闈花翻照清溪水溪水東北流妾心亦瀾
瀾

懊惱白嶽山不理相思事山頭文蘿花豈爲秋風
吹

妾心若旌懸上牀如上船春風吹好夢隨水到吳

天

夜半出中庭喜逢斗柄轉何意負情儂一見不復見

踏青聞草來怪底不分勝野草各一心相交那得定

朝渡錢塘江暮宿嚴陵灘東有早晚潮南有千萬山

自從苦相思恨殺出行日悞觸寧馨神至今不得吉

羨却銀河平恨殺錢塘險雀舫斷魚書鵲橋過鳳

輦

高高樓百尺下同賤妾身祇覺天日近
漸與風塵親

燒殘紅蠟炬抽簪刻郎心相看流淚盡
無影自沉沉

妾家角黍日正君端午時君愛一時
葛妾身偏着

絲

角關覺黍關暑午關
伴葛關割絲關思

浮雲一出山驅馳不得歇有朝天轉風
是儂歸時節

葛成謠

狠如狼貪如羊一朝民不忍剖心肺剗肝腸吳髮
短吳心長君親無將爾何將以兵諫者當自戕吳
儂瘞儂專諸傍

其二

鄉大夫錢有子毋田有租柰何貪得殃無辜家羅
烽火烟糶糊中官咫尺不可呼遂爾終身不得爲
錢奴噓嗟乎何爲遂爾終身不得爲錢奴

其三

太守朱吳所須名爲几肉身爲魚雖有赤心不如
刀苴

其四

使者耄兮愬失旄鞭檻虎兮射掣鼉如天之福媚
竈可邀烟飛竈突五雲以高旅人先笑後號咷

其五

勇夫葛者攻治絲辟除不祥寔備之六門萬姓祝
以尸有力如虎生可兒然香籲天帝昇爾兩龍騎
西領吳山南有震澤天池電爲鞭兮雲爲旗呼風
吸雨和四時

五言古

送張比部奉

使南還兼訊洪水部

昔人敦友誼天載漸杳渺吾儕躋凡庸久要持雅
道荏苒二十年素心恒皎皎貴賤雖迥如德禮互
相澡慙余辱泥塗多岐非宿好馳驅範周行有耻
信吾寶君心不我遐耳目淨如掃文酒時經過有
懷畢傾倒歷歷如溜澠衾影能自考聚散各有時
離絃作懊惱未別魂已驚欲寐神先藐恍惚唱驪
駒醒時半了了遠夢荒修途深林託歸鳥茫茫風
雨中山川雲繚繞南樓不久淹關山縵浩浩臨岐
阻一盃離群太草草携手念同歸功名苦不早羽
翼相背飛翩翩復矯矯豈其乏稻梁回翔在一飽

歸拍洪厓肩雙魚何枯槁髮行各蒼三立可忘
老努力乘明時斯民期皞皞

七言古

燕中別焦三

天無色海無邊瀾淪爾我於其間各來長安有何
意兩人不得名其然病中翳花忽一笑流水春風
歸去好淨心勸阻了茫然一曲驪歌綠芳草君非
作客我非歸如霧如珠向地飛芙蓉映水羸紅粉
明月臨秋化素衣紅粉素衣非我事朶朶蓮花有
蓮子其中因果知者誰四顧無人我與爾日荒荒

今樹蒼蒼天渺渺兮雲茫茫鸚鵡淨綠思孔雀鷺
鷺清夢斷鴛鴦帝青之髮行珂雪香水海中妙翅
滑龍女頻婆帳底來婚姻樹密迷羅襪焦欲買婢
吳中故諺

丈夫行贈吳大

丈夫生來薄宇宙髮髮稍稍非我有學書學劍一
無成爲佛爲仙俱袖手黃河流水成金銀可以挽
之佐酒尊太華羣峰鬱雲錦可以採之供吐吞耳
目口鼻滿天下如瞽如聾如啞者凡君三亡我有
焉魯國一儒君是也日月星辰光陸離君有文章

可匹之銀管鳳來窺玉樹丹鉛龍繞護珠璣我恨
平生三兩字蹉跎歲月今如此別君醉夢了無端
趯趯胡騶嘶月起

射鶴行贈吳乙

鶴尋
贈余

番陽公子美無度珠履金丸不勝數倚馬才傾袁
伏文登高興發鄒枚賦春風稅駕東海濱蜃市蒸
蒸羅彩雲三山使者衣素羽紫峰珠樹迷梁津公
子仰天發暴矢離弦直詣青城士丹頂虛傳入帳
奇冰爪徒誇漆書字潭臯給粟飲溶溪玉翅霜毛
映水漪翠黛花傳明月恨霓裳羽借紫烟飛主人

許與宋生乞歛項低眸刷雙翼聞弦弄影如有思
逗節奔機更悲激丈夫羈縲同剪翰啣珠報恩世
所難一朝鼓翼冲天去與我相期緱氏山

九籥集詩卷之一終

九齋集詩卷之二

華亭宋楙澄幼清甫著

友人吳國珍希聖甫校

五言律

鳥啼

春情濃曉睡入夢鳥空啼
起來看樹影還向此中棲
轉翅閒花落遊絲隔岼
齊飛飛不可極疑共白雲西

送叔父隱居震澤

浮雲去不極招隱意如何
見說湖山好征衣問薜

蘿髮蓬蓬芳草色
夢狎白鷗波莫漫瀟湘去
心驚九辯歌

索復

宿昔稱連壁於今限各天
梅花空有使
桃李本無言
祇恨江如帶
虛疑月似弦
罰將金谷酒
廻却剡溪船

近况

新詩無法律興到輒欣然
如入蓮花坐猶橫紫玉
鞭醉劇輕天地癡
真小聖賢近來都減念
差喜腹便便

寄送

夫子真人傑廬山亦地靈常瞻五帝座傍有少微
星盎中多芋栗行散足參苓蒼生思請命冬日想
儀刑

送焦三

君行吳復越夷險聽長年踈螢飄野岫遠水瀉平
田雨迷三竺月柳護六橋烟此中近滄海禹穴亦
相連

題范大博野居

生長在 cities 好人常獨居標梅同主客野鳥自親

疎靜閑三乘法閒披一卷書君能遂清率石室乃
吾廬

送何大入蜀

蜀道無難易男兒不顧家杜鵑當社燕濯錦漾明
霞歲暮峨眉看雪春深白帝花此時行樂處莫作是
天涯

亡兒虎

別去都忘語因風散此生云何分爾我究竟若虛
盈六年無定力此日若爲情有眼能禁淚闕干任
月明

自適居

四十二年又一朝都破除
心隨老楓化身悟
虛白飯堪持
呪单衫好
遂初擊轅復擊壤
日月任居諸

古意

暮雨一燈下
撫琴鬱無聊
憐予懷古曲
揮手未嘗調
非關憂忤俗
五指自來驕
不如俠年少
結伴學吹簫

自笑

近况今何似
依回念老親
無心對清醕
底事犯黃

塵不喜文章業偏於筆硯頻未知頭白後得失作何因

寄趙二

東南近無恙吾子好歸來江中阿育塔海上越王臺每到登高處嘗思作賦才旅庭有明月可以屈金罍

寄遠

離心催我去婉孌暫違歡霜月蟾輝冷秋風鴈影寒青衫宜桂樹紅袖想雕鞍何事菱花鏡年年兩處看

金山

大海一漚發東南此地分沙連秋露月風引暮山
雲鴈塔迷珠樹漁燈漾水文此中了無相形色自
紛紛

贈金山僧

昔年因寶藏曾向帝京來玉匣收宮錦摩尼蕩劫
灰秋清龍母護草綠象王迴從此空諸相天花滿
碧苔

賦得夢約水精環

身違琥珀枕夢約水精環脉脉當秋月明明透手

寒就中微有缺，別後忍教看。從此生歸思，鷄聲發曙難。

賦得黃河如帶

征人西北去，回首問東風。柳約輕鬟綠，花隨禿袖紅。安危占鴈字，離合信魚封。莫以河如帶，微波尚可通。

懷錢大暨趙二

吳越山川阻，相思不易陳。野雲迷遠樹，津鼓送征人。每歲常爲客，今生更幾巡。飛飛月中鴈，來泛故鄉尊。

送友人

柳條未吐色梅花無數新
試看空裏雁何似鏡中人
焚草呵青帝欽雲寄紫尊
他年三界水可以喻君仁

下第別友人

努力良不易相期徑寸心
校書同夜月懸髮想朋簪
劒冷蓮花澁水清柳影深
靜中人自遠車馬有遺音

其二

蕭然對秋色離心詎足陳
愁看馬上客羨煞渡頭

入年長詩情短寒多酒興新相思各千里魚鳥豈
無因

九日同友人登興德寺觀空臺有懷故園

臺樹空諸相無緣指故廬朔雲深度鴈秋水靜藏
魚酒碧侵萸影花香發雨初不知今夕夢離合竟
如何

寄友人

一從爲客久懶作故鄉書入座占人面看雲耻曰
居舊盟尋草木新社結禽魚篋劔鳴風雨雄心愧
未除

淮陰道中

走馬淮陰月隄荒水氣籠人行
雙鏡裏魚躍亂星
中急溜鳴欹石危橋激曉風
砧聲秋夜永夢入海
雲東

廣陵早發

遠樹藏村火空餘月半輪
鳴鷄徵驛吏嘶馬訕行
人雲蒞山凝翠風輕水漾鱗
寸心終耿耿不敢畏
征塵

感時

近事將何極稍稍漸不經
野人瞻北闕羨嬾仰前

星溟海風羈譯燕然雨剝銘頻年饒水旱九土未
全青

月中宿邵伯

趨程忘日暮疲驛枕荒郊擊石煬新竈敲針釣晚
殺牀空搖馬影窓隙架烏巢幸有刀環月依依上
柳梢

其二

野店臨官渡柴門暗草茅游絲杯上拂更鼓案前
敲月偃人窺橐弓垂鼠弄弮同行念裘馬慶語亦
相嘲

其三

水國喧波浪逢迎忽乍交馬來蜀汲水客到南誅
茅律呂蟲相和泥沙鬼暗拋江南近如許差可傲
鳩巢

淮上

村荒迷客路徑指轆轤傍故榻埋青草危簷倚綠
楊魚吹人影亂鷗訝馬蹄忙白露驚秋髮蒹葭半
已蒼

滁陽懷郭氏故封

山腰斡於削控勒仰穹窿薄霧生衣上輕雲結樹

中珠襦酬昔恨金盃秘竒功
甲馬悲風急依稀下碧空

關山謁

武安王廟

山有赤兔跡

群嶺爭環拱雄關扼翠微
人同白鷓度松與赤龍飛
雲電馳金勒風雷振鐵衣
沉吟千古事無計挽斜暉

秋日重經宿州時濉水爲黃河所遏瀾滂無際四顧蕭然余嘗三渡符離是役不勝悽惋遂托四咏

曉發睢陽驛牢騷絕送迎
蘼蕪簷借長榆柳水支

生馬足馮三老鷄聲費五更年來頻過此耳目幾
回驚

其二

南北控神京干戈此戰爭黃河藏日影濰水照人
明掠荇分魚食褫衣賃馬行若教常侍見低首亦
含情

其三

東髮遠行役關山幾變更豈伊揚柳岸化作藕花
城貪用龍移族迎秋鶴厲兵王師初罷討畫角莫

悲鳴

雁第四指
爲兵爪

其四

洶洶黃河水何年此地行亂峯遮不斷一水濁兼
清堰決魚遊釜堦湮蟻附楹野人相嚮哭白首負
昇平

桃山謁岳武穆祠

浴血干戈裏征衫斷酒痕順風開殺氣信手鑿生
門鼓息蛟龍螫金鳴日月昏書生悲寂寞叩馬測
軋坤

汶上

蘄北三千里今朝半未曾聞鷗翻馬跡短壺射魚

燈棗赭兒爭覓梨黃縣欲徵臨流私顧影水鏡香
難憑

渡故宋漕河

在恩縣北土人各趙家河

西上通京雒朝宗想建瓴水痕籠野霧曙色帶殘
星野雀爭蘆絮城狐募社靈惟餘故隄草猶向挽
人青

其二

水脉東連海燕齊土俗驕篙師呵故吏父老艷前
朝毒霧神驅馬愁雲鴈避鵬金湯不相待紅粉一
時銷

九齋集詩

卷之二

九

其三

秋風旣蕭瑟况復水迢遙禾黍依殘照楊枝寫細腰
九城巢燕雀抔土寄漁樵脉脉空餘浪帆檣半寂寥

河間

水國波濤濶秋風感鬢毛柳情傳電線花事托霜毫
野戍天狼午邊城太白高無爲戀明德寒色起征袍

其二

京華烟樹接秋日朔雲高河海沉雙鯉滄桑問六

鰲花香侵白墮霜氣入烏號醉裏還家夢舟車不
憚勞

採蓮

來往惜輕盈臨流態轉生低回測深淺拂拭照昏
明衣亂歸雲影風移巧笑聲遙知花發處羅襪借
遊行

長安邸中同 洪令君守歲得年字

異地同心處今宵各黯然相看衣似雪但覺夜如
年淚燭辭殘曆荒雞散曉烟陽和應有待不與歲
爭先

九籥集詩卷之三

華亭宋楸澄幼清甫著

友人王增抑之甫校

七言律詩

時事四首

東海浮沉奉使槎
波濤石笋護桑麻
白茅臘夜封
驃騎玉鳥春風拜
麗華憶昔香圍龍尾扇
於今草沒鳳頭車
司農且莫征輸急
千里黃河一半沙

其二

潦倒春風不自持
若爲烟月費相思
麒麟競刻于

闕玉星斗閒搖太乙旗花萼樓空窺鳥雀昭臺宮
冷剝琉璃歌聲遮斷金鷄唱
幸喜東方白日催

其三

萬戶千門護紫烟中宵襍被夢魂牽龍腰起伏憐
珠玉鳳闕荒涼滅俸錢苔暗夜明千日酒金迷水
藻五雲天年來斧鑿窮山谷木石交言亦偶然

其四

遙瞻執法已成空誰遣中台曲似弓九府棟梁充
禹貢千秋麋鹿走吳宮熙陵月泛蘼蕪綠碣石風
傳虎竹紅安得老成司袞職野人還擬誦車攻

送大令

吳山蒼莽越雲深草木蕭疎雨雪侵
明月暫教籠薄霧春風依舊再鳴琴
共知白璧原無玷誰信青蠅似好音
冷冷三江嗚咽處依依萬姓感恩心

其二

由來長信妬姪娥飛鳥無端及雉羅
草野蕭蕭懷雨露使君侃侃任風波
素衣不逐黃塵改明月其如蕙苾何
聖主方懸照膽鏡會看駟馬躍鳴珂

真州送別

楚水吳山總一鄉五年魚鴈若參商
江頭破鏡清

九
卷之三
一
秋月城上啼烏丙夜霜未許拈花生佛笑粗聞桂
子發天香他年乞與初衣後早晚浮雲可坐忘

與錢一辯西湖西子

有序

余友錢大常謂余曰越有西施復有西湖我將
娶越女家六橋爲西湖長足矣太湖波浪可以
殺人吾不能如向平之無賴余嘲之曰諸暨之
人語言衣服與吳大殊王是以館之霧巖踈之
消夏王亡於伐齊非因好色且從范大夫居陶
而去我五湖直一商婦至於西湖樓船歌舞種
種生獸一泓灰水腥氣襲人山徑鬱蒸卑濕特

甚以方太湖居然天壤吾將挾杜蘭香居縹緲
峰傲錢郎無男子氣也作四詩寄之

嘲西子

逢人漫說若耶溪越女君王定不迷
禿袖慣穿鵝子色歌聲難學乳鶯啼
看花纖手當曾貼對月雙蛾整夜低
怕逐蘭香天上去却爲商婦老於齊

嘲西湖

十年六度向西湖靈氣茫茫鬼可訶
覓寺觀濤峰不降祿蓮泛月水無多
蠻聲二老當頭立粉面平康拍手歌
愁見洞庭風浪險遠看青翠意如何

誇杜蘭香

莫謫秀出杜蘭香
天上人間總不妨
漫拂鏡臺雲
欲散醉携羅袖月
相將銀河度曲來
鸚鵡玉樹吹
簫引鳳皇
最是陶家風景惡
養魚畜犝數錢忙

誇太湖

三吳震澤遶群山
七十餘峰浸水間
盡日芙蓉搖
玉鏡
有時翡翠掠雲鬟
紫芝仙客題為嶼
明月君王寫作灣
守却西湖歸北岸
穩風波背口鬢毛斑

寄家二兄勸之買酒時余兄弟俱未見兒

意氣於今似水平
解將湖海老狂生
小意見山

常在對月愁看影共行欲借鯤絃調錦瑟先教鴈
柱合銀箏十年一瞬同蕉鹿霜鬢催人在五更
與錢大作別先夜夢隔岸之詠醒而足之因

嘲其墨守西湖

握手臨岐酒一杯乘風不忍更徘徊隔牆楊柳催
人別夾岸芙蓉待客來夜月相思青雀舫夕陽回
首鳳皇臺憑君乞與西湖去縹緲峰頭着意猜

秋日送高太史還朝

兼訊故知

依微木末露華浮容與涼颺起素秋帆引彩雲辭
谷水江澄璧月上揚州龍門已逐菼花渡鳳苑還

因竹實留不是商賢來帝夢曉鍾誰問翠雲裘
薊北關河道路長臨岐尺素寄相將青藜子夜懸
天祿彩筆春風繞鳳皇劔佩雙瞻雲五色歌聲交
奏日重光試從枕內探鴻寶不向中郎帳底藏

寄錢大

石尤風裏芰荷時坐對黃花秋滿枝把手未曾先
入夢裁書臨罷更題詩相看青鬢浮雲外莫遣空
山夜鶴疑野性自甘薇蕨老不須赤棘寄相思

送陳工部奉使南還歸省

儂郎官屬大司空極目南雲滄海東無柰曉雞違

問寢遂令征馬逐春風
王孫芳草萋萋綠阿母
堯樹樹紅此去轡軒應計日
最憐明月滿宮中

其二

飛龍早擅白雲篇
錯落宮袍度紫烟
五兩輕裝同柳絮
三年薄俸減榆錢
綵衣欲約春花舞
南極高纏星使前
莫向舊山誇內史
君家雙壁產藍田

送謝大行 使河粵兩藩

三河百粵遠夷猶
五兩輕裝一蒯緌
遠志飛花隨去馬
枕椰墮粉送歸舟
客程布穀星侵曙
官柳鳴蟬鬢
欲秋最惜丈夫憂
國淚莫隨江水向東流

送閩縣

百里明溪許量移原豐屈指及瓜期
踐更月鏡窺金崎欲漏星辰耿荔支
轅下犢晉江畔草釜中魚孕劔頭
炊司晨青瑣催封事莫負當年起舞時

除夜志感一首

百緒驚心行路難日歸聿暮感雞壇
朱門燭影連三市白雪梅花舞七盤
龍夜西宮魚鑰靜鳳題東閣鵲文寒
頻年旅食甘粗糲猶自憂葵傍藥欄

歲暮卽事四首

萬方所籠歲寒時雨雪間關報
關絲盡

羯鼓舞餘楚女妬燕姬黃旗漫壓邨烟曉白骨平
添野燒炊惣爲宮雲深萬里苑墻啼鳥有餘思
銀河倒瀉洗胡天嶼海鯨鯢首通懸綠纒未填金
穴滿紫薇欲倩水星纏千年屋社熒燐火五夜珠
宮幕禁烟遮莫午雞催曉鏡蒼黃已在九旒前
高樹深深隱翠華輕羅細細引龍牙雕搏鵬羽飛
殘雪鷓捋魚鬚立暖沙舞袖乍迴弓借影淚痕偷
墮劍生花曲終南內喧簫鼓西苑墻邊候酒車
鐵室銅門翼未央明珠翠羽闔新粧月中壓笛暮
天樂酒後尋花傍苑墻鴻鵠未高千里翮紫芝空

老五雲鄉傳聞玉輦多巡幸無柰園丘道路長

出都門

落虹亭外夕陽邊回首春明起暮烟雨後亂流衝
馬腹風過細柳息人肩綠沉中使三千客黃帕材
官尺五天誰謂繞朝工贈策十年空羨祖生鞭

偶觸

路傍側耳聽須臾苛政何如虎負嵎餓殍減糧辜
聖主踐更吞淚別妻孥青蚨慣亂千條律朱篆能
收百姓孺早趁秋霜嚴隼擊莫貪夜半二天呼

計偕

回首春風淚滿襟東吳西越夢相尋求田已及三
千頂佩玉先朋六百簪假寐青袍驚斷袖目成紅
粉借琴心山公啓事明於鏡昏却東施買笑金

豪門

平津東閣傍城隈夜氣金銀侍女猜雲落水亭青
鳳集電飛玉座赤龍回家藏國讖奴千姓笑指天
文酒一盃爲問衆星環滿月何如七寶闌教臺

異寶

自鄭州抵雄縣

青山西北控中吳滄海東南莽大荒
兇樹綠楊沉

馬影千條碧藕賽蜂房城埋殺氣雲常黑沙捲悲
風日欲黃借筋不須籌往事試搥村鼓疊漁陽

止客遊江南

年光花月九州同浪說江南似鏡中山丹亂雲呵
蝮毋珠懸野樹鬪蜈蚣金閫白晝刀飛練胥浦黃
昏鬼喚風酒後刀環循數數穹廬差足老英雄

送黃比部

不向春風舞拓枝曲江花煖控青絲相看驥足超
羣日正是王良攬轡時鑿地纔通朱雀水及門新
領鳳凰池蕭蕭匹馬長安道幾處村烟接曉炊

送徐比部

兼慰悼亡

涼風枕簟夜凝秋，客舍傷神不自由。
明月怕教圓似鏡，鴛鴦何意狎如鷗。
遙瞻椿樹頻稱壽，却憶萱花可療愁。
佳夢從來雲五色，南飛應繞鳳凰樓。

送人

燕市相逢歷歲寒，情因同舍倍交歡。
秋空鴈向南雲切，野店鷄荒北斗闌。
白苧城邊喧鼓吹，芙蓉花下集衣冠。
知君雅抱天人畧，四海方歌行路難。

送鄭都官使雍州

雪裏題詩送遠行，斜陽不煖暮烟生。
灰飛葭管經

蒲坂路繞梅花發渭城濁酒若爲離別重白雲無
係往來輕道逢夾轂君休訝會見他年識履聲

宿負交謫復棄所居卽事戲簡壁端

中庭無月手無錢不特雲霄獨黯然償責刻期遊
子意挾賢矢口貴人權饑來羨蠹能食字釜裏無
魚浪擊鮮縱令尚餘吾舌在試教轉日與回天

夏日夢至吳中桃花歡與見桃上人試畧茶
夢到江南不到家湯從蘭石試新茶烟籠石砌迷
紅芍潭樣雲光動碧紗鉢水無風龍臥柳法苑
供鳥啣花浮生幻境何時覺未覺惺惺總是差

金閨春夜有懷故園

春申南岫築鄒東耿耿三河一棹通
冥色月深修竹裏曉烟香煖百花中
鷓鴣春暮供醅綠鸚鵡燈前促女紅
金印未懸歸未得莫將雙髻到青銅

送王比部

雨後涼生天氣高晝行爭羨錦宮袍
內庭戲燭先成鳳東海持鈞獨釣鰲
秋日芙蓉開幕府春風楊柳映江濤
故人若問遊閒信一半歸心寄大刀

客遊出門口號

寸心萬事已如灰猶向長安學自媒
此夜菟裘空

有月爾時蚊口漸成雷花含宿雨分離淚水泛新
荷代別盃他日試開東閣待可能無復故人來

送友人○使建業

計日星輶指故鄉春明別酒泛菖陽江中回首分
鷓鴣臺上相傳有鳳凰別恨不隨明月盡交情漸
逐柳絲長逢人莫美文通賦筆底生花滿路香

贈許侍御

白榆歷歷靜無譁驄馬行行似辟邪洛下春風思
雨露秣陵霜色想朝霞天衢未遂東山屐綵服猶
携滿縣花聞說侍中仙路近姓名無柰已籠紗

秋日遷居豐城里

江南秋色夢頻經十載長安愧挈瓶憶昔故鄉常
客處於今逆旅作居停錢刀頓逐征逋貴狐鼠新
從媿竈靈愧我不才愁桂玉敢從析木指三星

送李比部奉使密雲便道南還

僊吏乘秋出白雲蕭蕭落木鴈紛紛黃花濯露迎
星使紫氣臨關切斗文香徑風烟頻入望太行青
翠若爲分歸途明月圓如鏡到處清光總是君

京中人日立春同洪令君之鷲峰寺禮旃檀
佛歸惱張比部邀酌不踐

東風上苑歲華新萬里歸心不用論笑却半生馳
電影浪逢七日此年春醉迷粉蝶還成夢綵雜梅
花總未真試問僊郎歸騎晚高燒銀燭對何人

其二

長安人日喜同人况復逢春物候新眼底空花何
待剪天邊明月未成輪威儀丈六傳諸相世界三
千寄一身無奈白雲迷鷺嶼辛盤此夜正留賓

三十
二相

送吳大行

鷄語間關螢火乾陽春白雪滿長安花開上苑先

春杏夢到深閨總是蘭未遂叩關雲蔽日久虛問
寢夜衝寒思君不逐三秋盡明月中宵幾度看

元日試筆同洪令君得思字

九陌凝寒曙色遲星河無影漏參差花開滿院椒
先泛影逐雙鳧鳥不知蠟燕迎風催柳色符雞趁
曉上桃枝禁城列炬朝天處多少蒼生起慶思

無題八首

將渡

何年偶種有情癡今世相逢似較遲對月要言紅
滿徑臨風惜別綠濃時當如秋燕尋歸路莫學春

蚕只費絲桑實江南看漸熟改鳴蚤晚莫深疑

惜昔

喬林反舌已無聲爲美嚶鳴更遠征暫折柳枝揚
子渡滂償花債闔廬城鬢踈青鏡心俱亂夢入丹
楓淚自生昔日刀環原有約宮袍莫以夜遊行

治繡

買絲端擬紉深恩豈意還教倚市門比翼織成應
不散連枝繡出定同根願如弦月何時滿夢見黃
河到底渾道遠未知心去住征衫猶有舊啼痕

旅迷

夢中忘却久分離猶是含情歡笑時來去豈因雲
樹隔殷勤惟有錦衾知猶尋舊約頻私語贏得新
愁不上眉畫角悲鳴天欲曙江南江北總堪疑

揣來

一爲輕別意中人夢裏歡娛又幾巡藕節牽絲愁
欲斷蓮心被劈苦偏真歸航未必從江水口血將
乾侍鬼神留得舊時情緒在相知誰道不如新

虛疑

近來心事竟何如煩惱多應未破除簾影不遮蝴
蝶夢秋風幾度鴈臣書欲隨禁苑花同發無奈關

山月屢初別後講臺會上否數行修竹子雲居

夢繼

昨宵依舊在江南徒倚花前思不堪何事彩雲移
楚岫惟餘明月下寒潭蜘蛛牽掛空相待鸚鵡能
言未忍探隱隱鄰家諸姊妹管絃留客正淹淹

規思

燈殘魂返漏聲沉盟誓多端豈暇尋祇爲兩心無
托處至今雙淚不能禁王孫珍重迷芳草缺舌間
關效好音索莫茂陵消渴久集靈僊露思偏深

代贈

偶隨仙侶泛仙舟，遂許無心狎海鷗。
繁露三冬誠足用，東南一角可全收。
芙蓉試採無由寄，桂子須褰最上頭。
聞說君家能作賦，試同王粲一登樓。

壽客

海中縹渺見三山，除却朝元盡日間。
選勝乘鰲時列會，滂遊馭鶴偶躋攀。
酒當花月頻中聖，藥駐朱顏得大還。
應是群僊來集慶，玉樓蚤已遍人間。

其二

銀榜璇題玉作樓，翩然乘輿下丹丘。
蟠桃未結千年蕊，海水先添十屋籌。
虎阜黃雲隨客棹，鶴城壁

月送僊舟明年封酒遙相憶爲折梅花寄遠遊

送袁三從軍

十三走馬與探丸遮莫於今興未闌袖裏鳳毛他
日淚畫中麟閣異時歡臨風把酒澆司命說法看
身愧宰官鴻鵠湧堅千里志相逢莫遣愧雞壇

其二

生來解散橐中金屈指朋從我盍簪自信丹青留
廟貌敢從文武論升沉涼風虎嘯森冬殺雲雨籠
飛作夏霖記取當年銀燭下莫教園玉負深心

代人寄遠

徙倚闌干冥色來水寒山澗路迂迴空中柳絮風
前度笛裡梅花指上開每次烹魚思錦字漫隨暮
雨到陽臺彩箋別後無由製虛擬登樓取次裁

九籥集詩卷之四

華亭宋楙澄幼清甫著

五言絕句

友人范迂漫翁 甫校

張女郎孝思歌

涼月飛青鏡
熒熒照人心
熒熒不可住
征馬鬱歸音

閃閃銀交刀
莫斷忘憂草
留待春風中
臨高寄青鳥

白雲宛宛飛
我心曷能已
可憐魂夢中
行行復止止

高燒盤龍燈窅窅風無聲似聞夜鳥啼咽爲子規
鳴

瓦霜欺短髮無奈此秋風鴉髮能作飛飛入白頭
中

五十而慕孝子也嫁慕父母孝女也神嫗救之
學者咏之不亦宜乎

朱孝廉允復旋被論落藉作九章廣之

軸轆轉人心刀圭滲儂髮往事起涼風歸心對秋

月

其一

珍重儂青衫阿誰得二錫歸從滄海君嘗探萬年

曆

其二

行行慙帝恩第教挂冠去人生能幾何出門如天

曙

其三

且喜東上門夢中沒交涉十年促織心祇解驚蝴

蝶

其四

歸來剛秋風螢火已箇箇阿誰不裁囊教儂暗中

坐

其五

戲撥蟹兩螯宛轉如雙臂儂本字無腸向人若有

意

其六

臨岐拍馬鞍怨儂雙膝蓋踈請不成辭語語都無

賴其七

行到瓜步頭江楓化成血父老謂余言此古書生

舌其八

跪儂古佛前懺儂香一炷離合本尋常悲歡若嫁

娶其九

七言絕句

戲兒

六歲小兒樂事多笑拂綵衣行且歌眼看森李子未
得熟生憎日月不如梭

病中自詠

病中招得酒魔歸更有詩魔不願違
二鬼許容相伴老花前月下總如飛

和藍進士箕仙邊庭四時歌

春風漠漠度王庭長白山頭凍不青
無奈河橋楊柳色先來笛裏怨飄零

青海條支路半諳日蒸苜蓿氣如醢
夜深明月生涼露却喜單于欲向南

健馬良弓出短垣酒酣超距汗龍弁
年來虜騎天生怯惟有飛鴻度賀蘭

打帳歸來月未收青驄坐擁紫貂裘
血中奪得胡

兒婦今夜深閨夢不投

黃沙白草古輪臺一片蓮花馬上開
落日朔風喧戰鼓陣前先縛射鵰回

白氏第五女郎長齋十二絕句

有序

壬辰之春余偕友人訪婁中曹大王五遂成傾
蓋處同几席出共舟車者幾年時王挾五郎曹
擁七生無何而各以事散去丙申孟冬偶客吳
下乘閒訪白氏則七已從人五亦長齋四年矣
從人者勿論獨感五生之於王五申以盟誓重
以要言而卒有中路之悲豈李郎之黃衫交文

君吝白頭吟乎又吾聞五生藏凌錦衣金屋幾
二年而復出則修齋誦經未必非感慨於兩公
子之離合也嗟乎余之感慨不減昔人而爲衆
生之鷹隼五生坐臥小樓非人若兔而不肖猶
覩顏人前豈其奉教君子而五生之不若用發
勇猛之心斷絕邪淫之好蓋法無久暫達者機
先境不逗留迷者執着五生之茹三紅顏若駐
其於瞿曇亦無有二相矣第常稱心痛豈未從
范大夫於五湖耶謹摘俟佛短章以廣其意

每疑龍女種前因素手明珠字辟塵鸚鵡隔簾呼

得醒然燈佛對湊心人

羅衣拂拭佛前香未許禪心入道場
贏得顰看青鏡裏等閒恨殺館娃坊

桃花欲綻柳成陰繡佛長齋了業心
水月觀開龍虎鏡晨朝課發海潮音

曾同鬪草七香車蝴蝶迷香逐鬢鴉
今日日西窓未啓鏡花光裏落天花

媚眼成來一半青蓮花醉雨未全醒
中宵月冷鴛鴦瓦沉水香拈孔雀經

經罷燈昏月倚樓薰籠烟午帳垂鈎
當年酒半殘

藏夜不覺金壺到曉籌

不問連枝事有無且從雙樹論榮枯幽情常對西
山閒欲逐清光汎五湖

月光斜浸水晶簾冉冉慈雲翡翠兼靜守博山如
有悟啣花百鳥不窺簷

春風香煖百花洲同伴相將上彩樓莫以玉壺生
懊惱乳鶯啼向綠楊頭

無心楚舞厭吳綾欲借交刀剪葛藤酒醒夢迴寒
夜永悞彈青淚減銀燈

幾番折柳送王孫紅袖啼痕間酒痕最是觀音能

彩苦近來離別可消寬

三界空花有了期五年歌舞總堪思同時姊妹今
誰在欲問庭前栢樹枝

雜興

有序

戊戌仲春住吳郡桃花塢風雨經旬留滯蘭若
憶昔年上下群山作雜興詩三十首夫有意于
擬古則失神情有意於創始則傷骨氣余無意
人間者也而敢有意於文章乎善戲謔兮不爲
虐兮則某竊取之矣

山清雲淨月彎弓擬射長鯨滄海東鵲印不交秦

草夢燭飛花影玉缸紅

時東征報捷

嶺雲皎皎送歸龍石徑花溪澗不封
暝色欲來啼鳥靜一輪明月數聲鍾

惠風香草發春江浪夾流光入小窓
欲向此中參法界常明日月性無雙

雨久梅花吐萼遲櫻桃未綠寄相思
閒中自蠟登山屐遮莫天晴趁酒旗

夜暖閒庭草色肥鳥因晴日趁花飛
有情最是東流水圍繞春風不放歸

十年湖海結專諾居有叢臺食有魚
夢入江南春

草色眼中如刺一床書

時余已謝
錫部

小艇春山酒一壺醉臨石磴倩人扶生來病骨多
凡相青眼時時寄五湖

殘梅零落葉初齊夜露纔濃唱曉雞不惜春來貪
短夢試看蝴蝶爲花迷

春心隨夢到天涯桑海無因合玉釵昔日梁園歌

舞罷梨花寂寞滿弓鞋

陰懷君
平之恨

榆關征馬幾時迴月白霜寒入夢來最憶越中諸

將士牡丹峰上陣雲開

牡丹峯乃昔年越兵
破烏夷處地在朝鮮

神州地脉絕金銀草木山林不放春筍掃紫微垂

白練星飛碧海轉朱輪

癸巳秋葦掃紫微垣色如白練有星隕於東溟六如

轉

兩宮夜半驟氤氳三殿平明結火雲相國袖中藏

草疏午門回首夕陽曛

勸密揭也

海外名香斷返魂淚痕耿耿對黃昏是耶不見臨

珠帳桃李翩驪殿角門

時李敬妃初薨

迎花對月倚欄干把酒頻將北斗看聞說東風生

戰伐招搖且莫指長安

鳥聲欺雨六根間笛裏梅花暗往還何處得他禪

定力昔年襟袖已潛潛

沉沉踈雨結寒烟一縷旃檀小竹前好鳥不知春
已半看花交語更忻然

春暖流澌鳥鵲橋千花萬樹繫紅綃虎符初禁東

山妓月下城西聽玉簫

時掖使者禁婦女遊春

十年玉輦祀南郊上苑梧桐鳳欲巢馳道六龍驕
不御更煩諸將問包茅

禪心早晚謝藍袍瑪瑙空裝白雀刀紅杏曲江春

酒後莫將雞口惱龍韜

同學兄弟釋褐談兵

逃名不作五噫歌上下春山醉日多懶向黃姑邀
織女且從青帝乞嫦娥

醉眼時看白日斜楊枝垂線引桃花使君爲聽羅

敷語不及鴛鴦宿暖沙

時東征者衆

千隊吳兒赴戰場短刀犀革綠沉鎗依依楊柳離

江北兩雪霏霏度鳳凰

鳳凰城亦朝鱗地

茗烟梟娜竹邊生雨過梅花分外明來日不須愁

命屐夕陽啼鳥語先晴

五更踈雨洗殘星鐘語初停罷展經花底黃鸝新

結伴慇懃催得柳枝青

茶色天池綠未曾堯峰如鏡玉壺冰醒來一枕當

新月佛座香風出紫藤

鳳城空憶月如鉤
龍女歸寧雨未收
葉綠麥青桑

葉綠無心載酒百花洲

吳民多勤

忍隨杜宇起歸心
自有黃鸝送好音
翠帶風吹楊柳
纈紅顏月下海棠侵

自憐生長在江南
禹穴堯封恨未探
七十二峯青若黛
故人頭白好抽簪

烟深花徑雨淹淹
火綠琉璃護綵簾
野鶴欲巢疑

翡翠試拋珠樹向前簷

將遷居吳門

玉驄芳草恨珠啣
畫艦微風引片帆
晴日管弦來

響屐春寒歌舞試羅衫

應袁太史燕中祠白太傅蘇學士有懷故園

四時歌

東風啼鳥弄南音
夜暖爐烟香氣深
黯黯黃河遮客夢
粼粼楊柳亂鄉心

殿鴟無語鳥藏槐
香辟青蠅幔不開
遙憶浦前村酒色
遠風遙送芰荷來

月色霜痕照鬢毛
風聲削葉快於刀
前朝銀燭交天曙
此夜金門感布袍

雪引梅花到薊門
香迷蝴蝶近黃昏
生前半向江南老
乞取屠酥代白蘋

和錢大虎丘茉莉曲

十首

桃李飛飛鳥亂啼
顛船茉莉葉初齊
女兒纔到山門下
青眼看花東復西

花市平開斟酌橋
半教船販半肩挑
連枝腰弱扶青篠
並蒂頭垂繫紫銷

講臺東上禮諸天
鶯咽紅沉最可憐
無奈曉妝珠翠重
香錢移作買花錢

羅衣寂寞倚闌干
葉上明珠曉露溥
侍女穿花連蒂疊
傷心挑得有情看

雨餘香發夜何其
鸚鵡醒來念佛時
簾底美人初

浴罷攬衣花下月參差

織女閒將金剪開機前戲取白雲裁紛紛散作梨花
花朵濛上薔薇露一盃

綠陰濯濯月深深花朵金壺隔夜侵投却玉盤承
露水明朝彩線結同心

楚雲一別渺無還翻羨藤蘿不出山聞說小姑風
浪惡如何平渡等閒閒

雪消楚水紫瀾生夾岸千花送客行行到金闈花
落盡爭教玉草不傾城

不學紅妝鬪麗華蓮芳桂影雜明霞有誰何取陰

山雪乞與江南樹樹花

蛾眉

十五蛾眉恨不逢
生憎柳葉颺東風
一朝嫁得張京兆
始信從前畫未工

題金龍大王廟

會三爲風雨所侵余前嘗以札惱之也

黃昏金磬五更鍾
袍滾飛龍鏡貼曾
春水舳艫三百萬
天津容易發芙蓉

徐州

屢經金龍大王廟是日精美遂援筆謝之

曾將佳句惱龍神
風雨三回折角巾
今日彩毫頭半秃
碧天雲淨轉冰輪

寄錢郎

錢郎贈扇不題詩好似江淹夢後時
試叩筆花誰拾得座中惟有楚臣知

語然香人

北上清涼費往還普陀南海亦間關
近來參得諸天近不在空中不在山

燕中有懷羣公十絕句

沈侍御

笑指筵前鸚鵡鎗慣隨白雪往來輕
藥師乞與明光藏朋賭仙郎不夜城

楊太史

青鳥雲中惜羽翰
旅愁落月夢迴看
江干楚客稱無恙
雪裏吳姬可奈寒

郁大

黃河一半已成冰
浮玉山前渡未曾
待却仙槎迴
白雪蓬萊枯煞九枝燈

李比部

太行回首桂如霞
不美芙蓉鎖太華
爲約龍門雙
角鯉好乘春雨躍
菴花

袁三

花生彩筆月生弓
虛擬前身李衛公
何事病中消息少
多應行雨戀青驄

高太史

聞說生前是辨才
摩尼珠裏見身來
病中欲借蓮花舌
金馬門前取次開

潘舍人

彩毫字字挾風霜
金骨曾登選佛場
羅薛化爲書帶草
旃檀回作令君香

王祠部

十萬牙籤中秘書
禁雲五色繞長裾
閣中爇火懸

天祿窓外花香，薛靈魚。

趙大

雲黃雪白朔風高，小婦寒窓製錦袍。怪底懶沾燕
市酒，挑燈擁被展龍韜。

自嘲

青鬢蹉跎三十年，玄霜徃徃夢中傳。病來碎穀常
旬日，好去犁雲種玉田。

誚客

與日俱西與日東，東行何事不相同。遙知它日登
山屐，半滯襄王雲雨中。

其二

擬將窈窕代名山舞扇歌衫莫遣閒我欲邀君常
作伴蛾眉應在翠微間

徐女郎與余締兄妹之盟愧不能如虬髯之
于一妹冬日將別賦此

藉爾常來證我心一回證處一回深昔年秉燭間
關夜月冷霜嚴直到今

愧我同心尚食貧急難猶待曲江春每於酒後看
離別恰似當時榜外人

每瞻王氣倚闌干却愧孤心盟歲寒花在鏡中人

不採今生更得幾回看
此身不繫若飄蓬
寂莫寒汀待好風
莫訝五湖歸思晚
漫隨越客一相通

贈別

一縷香烟燈下來
微風黯黯漸分開
開時各自分飛去
不上襄王雲雨臺

其二

蝴蝶春深夢不調
翠娥暗逐旅魂銷
夜深頓足從前恨
幾度燈花不待挑

其三

楊柳絲絲綰別離如何傾倒任風吹憑君引入江
南夢綠到秋來不上眉

其四

傳聞春恨轉重重眉黛偷將鏡裏封明月關山圓
似鏡試看秋水映芙蓉

燕中元旦戲題神廟

千官大計在元宵歲旦先將紙鏡燒天上莫將容
易使兒啼女哭最難消

口號

十年羈旅在燕臺平等無過馬糞哉不管乞兒和

相國趁風一劍笑將來

五言排律

早秋寄懷趙二

在外久淹恤何當西復東別時逢夏火客思起秋
風急杵柳絲外鳴棹螢火中哀蟬似相訴玉露若
爲功忽忽月生桂行行江有楓刺船依寺影結網
羨漁翁骨相愁無媚蛾眉妬轉工自憐年老大莫
惜鏡朦朧拭匣常看劍持盃好避弓勾吳三徑在
於越五湖通嵐翠裝天馬蓴絲繫轉蓬潮連村樹
綠酒泛渚花紅曷且鳴如晦寒號守固窮談禪不

設律厭楹更忻籠登覽身差健耕菑歲屢豐已教
忘色相豈復辨雌雄意失䟽庭鼠刀慙鱸飲虹索
群思野草流水入絲桐早晚開蓮社披緇事遠公
七言排律

送高太史奉使瀋藩歸省

太白三杯天一方使星今夕斗承漿王孫莫以矜
鳧鴈上客從來領鳳皇別去萑陽爭捧劍歸時蓮
子半成房壺關障暑雲常黑漳水迎秋雨乍涼風
引青藜依玉樹月臨綵服借霓裳龍門花氣魚通
鑰虎觀芸烟蠹研香歡奉板輿籬菊下暫回輶轍

酒鑪傍明年柳發欽征蓋好和陽春滿帝鄉

秋日過滕縣卽景嘲之遂成十韻

巷後村前數十祠山頭水際百千碑馬嘶首宿猿
偷弄鷺隱蓮花羸突欺惡草襯殺愁客見沙甌印
餅怕人窺紫茄平削頭中髻綠柳斜連額上眉訛
律鄭聲隨口按失傳羌笛傍門吹當年兔窟今何
在此夜雞鳴恨較遲屨失晨征兒指點金分旅次
妾相思三遷幸舍憎彈鋏七月飜風愧說詩綿蕞
禮文翁仲習井田阡陌鬼神知君魂已逐啼鶻去
缺舌無聲啄柘枝

南韓薛地北爲鮑叔墓而叔孫實習禮於茲

詞

賦得長相思五首

有序

余於庚寅元宵前三夜泊舟胥門雨雪凄其夢
與所歡長別是年遂有破鏡之悲來往於懷與
日俱積戊申遇平康一女郎偶叩其年乃庚寅
十三子夜生也舉止凄悒如玉簫之見韋嶺西
愧無鍾鼎之勳遂負綠蘿之託已酉春將事北
上道出金閭值女郎生辰因賦長相思五闕而
別蓋方濟河而焚舟未暇犁雲以種玉耳

長相思短相思臨別梅花又滿枝宛似昔年時○

今相思昔相思十九年來我自知贏得鏡中絲

其二

長相思短相思縷添長命得紅絲火樹萬年枝○
鵲來時鵲去時生引離愁欲上睂爭訝酒行遲

其三

長相思短相思猶記城南夜雪時離心轉較痴○
久相違乍相隨羞見春來連理枝此別更增疑

其四

長相思短相思滿船風雪夢生離正君初度時○
心相依夢相隨若教此別更羞池清淚枉低垂

其五

長相思短相思錦樹何年金屈卮簫管乍淒其○
燕來時鴈來時冷暖人情祇自知尺素莫嫌遲

其六

長相思短相思但願常如初會時何惜又分離○
兩相思莫相疑若令君心似兔絲秋風一任吹

曲

中呂鮑老兒嘲沈楚雲媽

你那裏想着月明來的故人只恨着臨行時錯擺
了迷魂陣到如今只指望雪入明鑪變了花銀人

如玉博得个柳色，黃金嫩你開着口好一似螻娘
驚蟄行一步似蝎婆擔孕斜着眼似鬼母初醺

中呂堯民歌代楚雲嘲

你一似喬楊花沾淤泥到處兒生根化浮萍在波
浪兒裏存身變靈蟲到衣服兒上招魂那裏也白
雪紛紛只合着趁東風着地兒滾

中呂十二月嘲楚雲

我和你恩情最親畫得餅饑和飽共吞填得海乾
和濕同趁撈得月有與無並分鬼打鈹沒字錢用
了幾文平勃達忽地生嗔

卷之四終